

續  
文  
獻  
通  
考

續文獻通考卷之二百三十五

皇明進士雲間王圻纂輯

四裔考 東南夷 南夷

東南夷

琉球

按琉球在中國之正南偏東漳泉興福四州界內澎湖諸島與之相對亦素不通天氣清明望之隱約若煙若霧不知其幾千里西南北岸皆水至澎湖漸低近琉球則謂之落漈漈者水趨下而不回也凡西岸漁舟到澎湖已下遇颶風發漂流落漈回者百無一琉球在外夷最而食者也其國有大琉球小琉球其俗去髭黥手羽

人祭神無禮節好剽掠其產鬪鏤樹斲黃胡椒能罷豺狼自福建梅花所開洋順颺利舶七日可至其國自古不聞中朝隋海師何蠻羽騎尉朱寬訪得虜其男女五千人元遣人招諭不從國王初姓歡斯名渴刺堯後嗣王曰尚圓曰尚真曰尚清後分爲三曰中山王曰山南王曰山北王 皇明洪武初三王遣使朝貢壬子行人楊載使日本歸道琉球遂招之王願內附是年秋七月遣使貢方物且請封爵 詔賜中山王察度山南王承察各鑲金銀印時三王爭雄相攻遂 賜詔諭之并 諭山北王帕尼芝癸亥 賜山北印文綺王妃姪相寨官各有差壬申中山王遣子姪及其陪臣子

弟入國學上喜禮遇獨優賜閩人三十六姓善操舟者令往來朝貢自是三王嗣封皆請于朝每二年朝貢一次每船一百人多不過百五十人卽福建南臺外置番使館使至館穀遞入京永樂甲申察度卒詔封其世子武寧嗣王已而承察卒乏嗣弟汪應祖攝國事詔賜應祖冠服嗣山南王景泰元年中山王尚思達遣人朝貢未幾山南山北爲中山所并遂令三年一貢貢每百五十人察度五傳至尚圓嗣王卒子尚真嗣王嘉靖十一年國王尚真卒朝廷遣左給事中陳侃行人高澄以太牢祀尚真封其子尚清嗣王寺青吉于侃等曰天朝詔勅藏金匱者八葉于茲

史蔡瀚來表謝又請云琉球言大明一統志中載琉球有落漈王居壁下聚觸體非實事杜氏通典集事淵海羸虫錄星槎勝覽所述亦傳者妄也乞下史館從之琉球既遣人學於國學夷習稍變奉正朔設官職被服冠裳陳奏章表著作篇什有華風焉以土官爲武職其大夫長史通事官司朝貢定員爲文職皆三十六姓人及學子國學者爲之歲元旦聖節長至君臣冠服拜龍亭祝慶隆慶二年十一月十三日琉球國中山王世子尚寧差來正議大夫鄭禮等十一員名進貢萬曆二十三年四月福建巡撫許孚遠奏二十二

年十二月內提琉球國使于潮通事葉榮吾呈本年八月二十九日 中國二人身服筆衣蓬頭跣足稱說使臣指揮史世用承差鄭士元奉差日本偵探遇風沉船倖免死脫至琉球查無文憑可據視其人品議論疑似官體隨發舟差潮等四十三人伴送福省上載硫黃八十觔馬二匹以備明年正貢之用思得琉球雖僻居海島世奉 天朝正朔每年脩貢稱藩恪守侯度比因天灾流行地之所出不足以供國之所用又爲關白擾害十九年差人要金進貢二十年世子着僧天龍等到日本送關白二百焦布等物關白要討琉球北山屯兵此

下文盡命遂賞銀四百塊每塊重四兩三錢及同倭

見世子不允此僧遂自吊死倭使回報關白  
乃曰旣不肯與北山何故受我銀兩每年加利要銀四  
千兩世子不得已陪還二十一年又差僧建羞等到日  
本行禮關白將僧畱住卽差倭使新納伊到琉球要萬  
人三年糧食載至朝鮮世子以民困國小錢糧無處二  
十二年二月差僧回復關白以賀子爲由觀其動靜至  
今一月未回不知音信今中山王世子惟脩貢于中  
朝耻稱臣于關白年三十歲不敢稱王以世子當國位  
號未隆懇乞奏請加封向荷 皇恩之廣大益堅效順  
之微忱又據兵部原差指揮史世用呈稱琉球一國效  
順二百餘載累貢不絕必待 冊封方敢稱王屢歲爲

關白擾害蓋因地勢聯屬倚山無波濤之險由前摩所  
船四日可到琉球北山延袤三百餘里日本琉球之界  
又三日可到隨路有山早行夜宿關白見其路順欺其  
國弱所以聲言發船來伐要彼北山屯兵若果據北山  
則琉球必爲所得而閩廣爲其出沒之地盤據騷擾將  
無寧歲今中山王世子尚寧年十歲容貌奇偉頗有力  
量不肯臣事關白一意向化天朝其年長爲世子不  
敢封者因舊時封王官二員隨從五百餘人在彼半年  
食費供給最爲浩繁又連年爲關白所擾國貧民困故  
力不能請懇乞 酌處奏 請加封國王 頒賜冠服  
以爲忠貞之念差去員役不必另造海船動費官銀九



上貢使 貢夷使 帶回豈不便益臣看得琉球遠薄海外自古不通于

中國維我 祖宗威德廣被 朝貢始通請封則自宣

德間其定正使給事中副使行人起于正統間臣嘗讀

先臣刑部尚書鄭曉吾學編有云海島之夷勤我 封

使往來之禮款夷不言書云四夷來王八蠻通道未聞

有報使焉然則領封可乎奚爲而不可也陪臣請 命

于京師王人致 命于海上兩得之矣臣又考嘉靖間

給事陳侃行人高澄之奉使也以壬辰夏五月其行也

以甲午夏四月 萬曆初年給事蕭崇業行人謝杰之

奉使也以丙子秋九月其行也以巳卯夏五月或二年

或三年其難如此而巨艦造作非經年累月則不能及  
垂成而定艤猶有如丁丑壞裂復興之事所以難也夫  
以海外遠夷特煩朝使近侍諸臣奉命而往長驅  
萬里危險之地而况未造船鬣役煩事擾且一使至閩  
中更增有司二三年之累及其到彼也以帝臣而臨  
島服恤前王而臨後王禮遇隆渥彼固頂戴無地于是  
日有廩餼之供旬有問安之禮月有筵宴之設隨從四  
五百人淹留三四五月糧食搞賞猶且不貲則琉球之  
情亦爲甚苦此世子尚寧所以旣壯而不敢請封而使  
者于瀚等之所以陳乞也在朝廷遣使之難旣如此  
况求請封之難又如彼然則先臣鄭曉所謂領封之

今日可議而行之乎况琉球方受日本之侵侮  
正切歸戴于 聖朝不爲及時封以王號恐無以堅其  
效順之志而資捍禦之力乞發 詔書一道 諭令中  
山王世子尚寧卽具本來奏 朝廷止遣使臣一員齎  
勅至福建省城聽其差官面領或遣慣習海濤武職  
一員同彼差官前往致 命庶中國無出使之擾而  
朝命已達于遐方夷邦省貢費之煩而封典得承于  
上國且使諸臣免規避之情有司免採辦之累其爲利  
益非淺鮮也伏乞 勅下該部再加查訪如果臣言不  
謬乞卽 詔諭琉球世子尚寧亟來 請封遣使如議  
則 朝廷體統益尊而夷邦受 賜無量矣 上下其

章于禮部 二十八年二月禮部題琉球進貢謝恩  
封王爵 上曰琉球世子尚寧請封具見恭順但該國  
有通國印結及世子特具表文方見敬慎 天朝行與  
他知其差官一節陪臣既來敦請着選慣海廉勇武臣  
一員同他使臣前往行禮不必採木造船以滋煩擾亦  
不許多帶人役騷擾彼國有失 朝廷德意 二十九  
年九月禮部題奉 旨尚寧准襲封琉球國中山王遣  
官既來懇請着照舊差文官去

三嶼以後 皇明無述存之以備參考

三嶼

三 國近琉球世祖至元三十年欲遣人召秀之平章女

僧頗等言此國之民不及二百戶乞不遣使竟從之  
新羅

遼太祖九年十月新羅遣使貢方物 天贊四年十一月  
新羅國來貢

靺鞨

遼太祖天顯元年二月渤海旣平靺鞨來貢

太宗會同元年八月靺鞨來貢

濊貊

遼太祖天顯元年二月渤海旣平濊貊來貢

渤海

遼太祖嘗親征渤海大誣譏拔其扶餘府誅其守將遂圍

忽汗城諠譟素服榮索牽羊率僚屬三百餘人出降太祖優禮釋之越數日諠譟復叛攻破其城駕幸城中諠請罪馬前詔以兵衛諠譟及族屬以出改渤海國爲東丹忽汗城爲天福冊皇太子倍爲人皇王以居之衛送大諠譟于皇都西城賜諠譟名曰烏魯古妻曰阿里只改扶餘府爲黃龍府世爲遼重鎮

### 曷蘇館

曷蘇館不知其所始遼聖宗開泰元年其王曷里喜來朝後屢遣使來貢至天祚時馬哥餘睹等攻曷蘇館敗績始與遼絕金時曷蘇館其所屬部也

### 鐵驪

鍾亦不知其所始遼太祖天顯元年鐵驪來貢至興宗重熙時始授之官爲右監門衛大將軍自太祖至道宗無歲不貢至天祚之乾統而貢始絕云

蒲盧毛朵

蒲盧毛朵亦不詳其所始遼聖宗太平七年蒲盧毛朵部始遣使來貢其後人戶亦往往來附以方物貢者歲相踵

蒲里奴

蒲里奴遼以前不可考聖宗統和時始來貢開泰十七年伐蒲里奴執其酋陶得里以獻始與遼絕

兀惹

兀惹疑與蒲盧毛朶隣部也故蒲盧毛朶部多有兀惹民  
戶聖宗統和時兀惹來貢歲貢鷹馬貂皮後以其地遠  
詔生辰正旦外並免

南夷

南蠻總叙

南蠻有二自武陵而西歷徂山連朱接荆夔裔境爲南郡  
巴巫諸蠻出廩君自武陵而南歷酉陽沅靖奄及郴桂  
爲武陵五谿諸蠻出槃瓠其人雜篁簞林麓以居椎髻  
跣足衣斑被羶語言侏僂記歲月率以甲子要約以木  
鐵爲契種黍麥粟豆山芋爲糧伐竹木易穀獵山獸以  
食兒始生稱鐵如其身之重漬毒水中長鍛之爲刃



刃牛項下以肩負卽殊者爲良兒初行時燒鐵石烙足成重繭長能履荆棘刀刃不畏俗喜讎殺猜忍輕死又能忍饑行闔出入左腰長刀右負偏架弩手長鎗或持弩銜刀其口中不刀卽弩弩不輕試能以一足蹶張背手傳矢往往命中又或傳毒藥于鏃伏其弩伺不備中人輒斃臨敵有甲冑長牌上下山阪若飛畏鬼喜淫祀樂有盧沙鐃鉞愁笛壺笙衆音咬哇擊竹筒爲節跳躍呼噪相之以財力相君長父子別業父貧以身質于子亡忌怒則無論父子兄弟必加兵得牛酒乃釋鑄銅爲鼓有急則鳴之以聚衆稱有鼓者爲都老鼓始成懸庭中置酒召諸酋高會競以金銀釵扣鼓扣畢遺主人

而去諸部落皆然乃其心貪而多疑有動靜必卜竹筮  
枯惟恐失利編氓或狡黠者陰結諸蠻每爲鄉道分擄  
獲或詢伺機宜泄之故數數侵軼亡常大都王化脩則  
賓服德教失則寇亂其性如此雖暴鮮遠志故歷代征  
伐戍守撫援之畧皆觀其勢圖之不務窮討

### 廩君種

故巴氏子與樊譚相鄭爲五姓俱出武洛鍾離山石穴未  
有君長約擲劍中穴者奉爲君惟巴務相中之立爲廩  
君四姓臣焉秦惠王并巴中以巴爲蠻夷君長爵比不  
更世尚秦女有罪得以爵免其君長歲出賦錢民戶出  
水巾鷄羽其地在南郡之西北接徂山夷道南連武陵

四介巫夔後漸滋蔓越跨江北故稱南郡巴巫蠻漢興以隸南郡至章帝建初十三年巫蠻許聖等叛遣使者督荊州諸郡兵萬餘人討之不下乃督巴郡魚復數道兵攻之斬其渠帥聖等乞降悉徙置江夏昭烈遣將軍吳班攻破吳將李異兵於巫秭歸諸蠻響應乃分置宜都天門建平巴東江北諸郡蠻各就險阻居之劉宋於荊州置南蠻校尉雍州置寧蠻校尉以領諸蠻附者令戶輸穀數斛餘雜調孝武帝爲雍州時巴東建平宜都天門四郡蠻爲寇人戶多流散及卽位大明中西陽蠻皆叛沈慶之率江雍荊河州諸軍討破之後魏孝文延興中桓玄誅子誕亡入太陽蠻推爲主因築城號施王

擁河水以北強葉以南八萬餘落遣使內附孝文嘉之  
其後太和中襄陽蠻酋田益宗雷婆思等率衆千餘內  
徙求居太和川詔給廩食使開南陽全有沔北之地蠻  
人安堵不爲寇害武帝景明間東荊州蠻樊安等反遣  
鎮南將軍李崇討平之永平初東荊州表誕子太守桓  
叙興招慰太陽蠻田育立等二萬八千戶以歸詔置郡  
四縣十八梁武帝遣兵沿沔破掠諸蠻後魏遣蠻師桓  
叙率夏二萬餘人討擊之斬令孫等俘虜二千餘人其  
後因大鎮秦隴所在反叛荆郢蠻大擾斷三鵞路至於  
襄城汝水多被抄掠有冉氏田氏向氏大者萬家少者  
千戶僭稱王侯屯據三峽荆蜀行人至有假道者西魏

文帝大統十一年沔漢諸蠻擾動大將軍楊忠擊破之其唐州蠻田魯嘉亦叛自號荆河州伯遣王雄討之後周明帝時蠻師冉令賢向五子等反攻陷白帝武帝天和初詔開府陸騰討之蠻衆大潰斬首萬餘級騰乃聚其骸骨於水邏城側築京觀後蠻蠶過者輒大號哭自此狼戾之心輟矣信州舊理白帝騰更於蜀先主故城自八陣之北臨江岸築城移至信州又以巫縣信陵秭歸並峽中要險築城置坊以爲襟帶焉唐時號彭水蠻冠服不常宋真宗咸平五年施蠻數擾召問巡檢使侯廷賞對曰蠻無他求惟欲鹽爾因詔夔州路轉運使丁謂與之鹽諸蠻感悅相約不爲寇且曰天子濟我以食

鹽我願輸與兵食於是與溪州蠻皆願歲輸粟易鹽轉  
運使丁謂上言款蠻入粟實沿邊砦柵頓息施萬諸州  
饋餉之弊自古安邊未有若此自是邊粟有三年之積  
先是益州軍亂議者恐緣江下峽乃集施黔高溪蠻豪  
子弟捍禦之羣蠻因熟漢路寇掠而歸謂因召與盟令  
還漢口四百餘有生蠻遣約謂遣高州義軍務頭角田  
承進率衆及發州兵擒獲之蠻皆震懼伏罪謂置尖砦  
施州界以控扼之景德二年施州叛蠻渾仲通等來歸  
祥符元年夔州路言五團蠻嘯聚謀劫高州請令施州  
暗利砦援之詔以蠻夷自相攻不許黔州言磨嗟洛浦  
首領二千人歸順三年夔蠻千五百人乞朝貢慮其

分費止之乾興初順州蠻田彥晏寇施州暗利砦縱火  
去夔州發兵擊之明年彥晏歿邊上警狀仍加爵知州  
如故仁宗天聖二年詔安遠等州道遠聽以方物畱施  
州嘉祐三年詔以施州蠻何永勝所領州爲安定州熙  
寧六年詔施州蠻以金銀質米者估實直如七年不贖  
則變易之先是蠻因饑以金銀倍實直質于官易粟官  
不能禁至是始著爲令其後熊本經制涪井事宜蠻酋  
田現等內附施黔此近蠻子弟精悍善用木弩藥箭戰  
間趨捷朝廷嘗團結爲忠義勝軍及瀘州涪井石泉蠻  
叛皆獲其用元初置沿邊溪峒招討司及于西高州置  
大奴管勾等峒長官司尋以順川西界仍置細沙砦更

忠路金峒俱隸施州尋以施州隸夔州路峒主單順入貢進散毛爲府至正初施南叛詔都元帥紐璘諭降之更爲施南道宜慰司廢富州爲散毛峒以大狂地大翁迦峒令師壁安撫司領之更置龍潭長官司尋又更散毛普崖爲宜撫司給符印置官屬以順州爲忠建軍置湖南鎮邊宜慰使司置石溪峒長官司于故西高州又改高羅寨爲宜撫司其後施州峒蠻叛四川行省招降之進州爲施南招討司都元帥府無何明玉珍起蜀盡據其地 皇明討平之分設宜慰安撫及各長官司隸

苗

苗 古三苗之裔也自長沙沅辰以南盡夜郎之境往往



山之與民夷混雜通曰南蠻其種甚夥散處山間聚而成村者曰寨其人有名無姓有族屬無君長近省界者爲熟苗輸租服役稍同良家至年則官司籍其戶口息耗登于天府不與是籍者謂之生苗生苗多而熟苗寡其俗各以其黨自相沿襲大抵悞伎猜禍絕禮讓而昧彝倫惟利所在不顧廉耻喜則人怒則獸睚眦之際遂至殺人被殺之家舉族爲讎必報當而後已否則親戚亦斷斷助之卽抗到不悔諺云苗家讎九世休言其不可遷解也其人黷結跼蹐陟嶠穴躡荆棘捷如猿鼯斑衣左袵或無衿襜竅以納首別作兩袂急則去之挿雞尾于顛負蘭抱弩遇便輒擲掠狔突箐中不可疏捕未

娶者以銀環飾耳號曰馬郎婚則脫之婦人雜海肥銀鈴藥珠結纓絡爲飾處子行歌于野以誘馬郎清淫不禁仲春刻木爲馬祭以牛酒老人並馬箕踞未婚男女吹蘆笙以和歌淫詞譁浪謂之跳月中意者男負女去論妍媸爲聘貲羸縮貧而逝者通歲索之卽髮種種長子孫不貸也飲食惡草以蕎灰和林粥釀爲臭藩以魚肉雜物投之曰醕蛆蚋叢嘅以爲珍且矜富羨者則曰蓄醕桶幾世矣歲時召親戚槌銅鼓闢牛於埜封其負者祭而食之大嚮若掌以牛角授子孫曰某祖某父食牛凡幾要約無文書刊寸木判以爲信爭訟不入官府入亦不得以律例科之推其屬之公正善言語者號

行頭以講曲直行頭以一事爲一籌多至百籌者每舉一籌數之曰某事云云汝負於某其人服則收之又舉一籌數之曰某事云云汝凌於某其人不膜則置之計所置多寡以報所爲講者曰某事某事其人不膜所爲講者曰然則已不然則又往講如前必兩人咸服乃決若所收籌多而度其人不能償者則勸所爲講者擲一籌與天一與地一與和事之老然後約其餘者責負者償之以牛馬爲算凡殺人而報殺過當者算亦如之言語侏儻甚者重譯乃解與其曹耦善厚者曰同年同年之好踰于親戚與漢人善者亦曰同年稱其酋長曰茫稱人曰反自稱亦曰反猶晉之言咱吳之言儂也不

知正朔以鼠馬記子午言日亦如之歲首以冬三月各  
尚其一曰開年占卜以雞骨推之視其壘以斷凶吉或  
析茅爲兆病不服藥禱鬼而已不愈則曰鬼所昏也棄  
之不顧謂其巫曰鬼師喪無服或葬或不葬大抵諸苗  
之俗婚姻畧同而喪祭異善爲壘毒壘無形而毒有物  
中之皆能殺人或言壘有神熠熠若月以昏暮流人家  
爲祟以其日作壘浹辰而出之以中生人則已無生人  
則主人以其身服壘解而哇之否則神將曼殃于其室  
其在金筑者有克孟牯羊二種擇懸厓鑿竅而居不設  
茵第構竹梯上下高者百仞耕不輓犁以錢鐔發土穰  
而不耘男女躡坐而偶免乳而歸其聘財親死不哭笑

舞浩唱謂之開戶明年聞杜鵑聲則比屋號泣曰鳥猶  
歲至親不復矣在獨山爲九名九姓苗狙詐而饕餮以  
元日爲把忌閉門不出二七而解犯之者以爲不祥烏  
羅着可爲三月一日爲忌二十五日而解在平樂爲紫  
姜苗嗜殺尤甚得讎人卽生啗其肉夫死其妻嫁而後  
葬曰喪有主矣在白納爲賣爺苗其俗賤老而貴少父  
老則拽而鬻之在葛彰葛商爲短裙苗以花布一幅橫  
掩及骭在牂牁之間爲八番子其俗勞女而逸男以虎  
馬口爲市夜卧必圍爐厝火不施衾枕燕會擊長腰鼓  
爲樂以十月望日爲歲首葬不擇日以夜靜出之云不  
忍使其親之知也在陳蒙爛土爲里苗又爲天苗緝木

業以爲上服女子甫十歲卽構竹樓墊外處之以號淫者人死不葬以藤蔓束之樹間而已此皆苗俗之大畧也蓋諸苗所居必深山僻谷生而不見外事故其俗不移無公家更賦之給故其民情慢土無疆果蠃蠱蟻食物常足故皆跼竄偷生而亡積聚不通文字絕先王禮義之教故枝柱淫佚與鳥獸同歸雖得其人亦不可使則亦夷之而已

### 安南

按安南國古交趾也在中國之西南秦并天下置桂林南海象郡秦亡南海尉趙佗擊併之漢置九郡交趾居其一唐分嶺南爲東西二道置節度立五筦安南隸焉宋

圭丁部爲交趾郡王傳子璉三世爲黎桓所奪隨又爲  
李公蘊所奪卽封公蘊爲王李氏傳八世至吳昌陳日  
熒爲吳昌壻遂有其國 元憲宗三年遣使良合台攻  
之日熒竄海島 八年日熒傳國于長子光昺 世祖  
中統二年從光昺請封爲安南王 至元四年下詔諭  
以六事一君長親朝二子弟入質三編民數四出軍役  
五輸納稅賦六置達魯花赤統治之 十三年表免六  
事 十四年光昺卒子日烜立 二十二年日烜僭稱  
大越國主憲宗興兵伐之 二十五年日烜遣使謝罪  
明年貢方物日烜卒子日燾遣使來貢徵入朝不至  
武宗至大四年世子陳日煚遣使來朝 泰定元年世

于陳日煚遣使來貢 文宗天曆二年世子陳日煚遣  
使來貢元末天下大亂安南不至 皇明削平羣盜驅  
逐胡元 洪武元年登極 詔諭溥海內外日煚大懼  
又聞征南將軍廖永忠副將軍朱亮祖帥師逾嶺降何  
真定廣東西日煚欲納款又以梁王尚在雲南持兩端  
二年始遣其少中大夫同時敏正大夫段悌黎安世  
等來朝貢請封遣侍讀學士張以寧典簿牛諒封日煚  
爲安南國王 賜駝紐塗金銀印以寧等至安南界日  
煚已卒其弟日煚嗣立遣阮汝亮迎請 詰印以寧等  
不從日煚遣杜舜欽等請 命于朝以寧駐安南候命  
詔封日煚爲王是年遣翰林編脩羅復仁兵部主事



張福 詔諭安南占城國王各罷兵息民皆聽命 三

年日煚卒封其子曰鑑嗣王 五年陳叔明遣人朝貢

却不受 明年又遣人納貢謝罪請封當是時煚嗣王

叔明者煚兄也專國政 十二年煚遣使來貢 上惡

其彊悍數侵占城 詔諭叔明 二十年煚遣使貢賀

聖壽 二十一年國相黎季犛廢其主煚幽大陽坊尋弑

煚立叔明子曰焜主國事 二十二年又弑日焜假煚

名遣人來貢 二十六年遣禮部尚書任亨太監察御

史巖震直 諭令出兵討龍州趙宗壽 二十七年遣

人朝貢却不受 二十九年遣行人陳誠呂讓 諭令

還思明伍縣不聽陳氏傳十二世至日焜而黎氏篡之

僭稱皇帝國號大虞紀元天聖 永樂初季犛上表竄  
姓名爲胡一元子蒼易名奎詐稱陳氏絕奎爲陳氏甥  
求權署國事 朝廷從其請逾年陳王孫添平走至京  
言季犛弑篡季犛詐上表請迎添平歸還以國 上遣  
行人聶聰送添平歸國 勅征南副將軍黃中呂毅率  
兵禦之季犛伏兵芹站殺添平及我使人 上怒 永  
樂四年七月辛卯以成國公能爲征夷將軍總兵官西  
平侯晟新城侯輔左右副將軍豐城侯彬雲陽伯旭左  
右叅將大將軍率右副將軍右叅將及清遠伯友統神  
機將軍程寬朱貴遊擊將軍毛八丹朱廣王恕等橫海  
將軍魯麟王玉商鵬鷹揚將軍呂毅江浩方政驃騎將

軍朱榮金銘吳旺劉劄出二十五將軍以兩京畿荆湖  
閩浙廣東西兵出廣西憑祥左副將軍左叅將統都指  
揮陳睿廬旺等以巴蜀建昌雲貴兵出雲南蒙自兵部  
尚書劉儁叅贊戎務尚書黃福大理寺卿陳洽轉餉是  
日 上幸龍江禡祭誓衆曰黎賊父子必獲無赦脅從  
必釋母養亂母玩寇母毀廬墓母害稼穡母恣取貨財  
母掠人妻女母殺降有一於此雖功不宥母冒險肆行  
母貪利輕進罪人旣得卽擇立陳氏子孫賢者撫治一  
方班師告廟揚功名於無窮其徃勉之時晟鎮雲南先  
遣彬以征夷副將軍印制授晟十月輔兵度坡壘關傳  
檄數黎賊二十罪遂入雞陵關晟兵至白鶴江賊拒守

富良江能卒以輔爲征夷將軍代能十二月 勅行人  
朱勸 諭黎賊晟兵奪宣江進次沱江輔兵渡沱江合  
兵渡富良江進克多邦城焚賊西都賊走入海輔駐兵  
交州晟追賊至木九江 五年正月輔晟合兵破籌江  
柵賊走悶海口敗之富良江五月賊走乂安都督僉事  
柳升率舟師追賊敗之得賊船三百賊遁且入海輔晟  
乘勝追之升引兵出奇羅海口賊敗卒王柴胡等七人  
擒李聲李保等十人擒其子澄安南人武如卿等擒僞大  
虞皇帝蒼僞太子芮僞將相王侯柱國黎季貆等 詔  
求陳氏後復立爲安南國王國人言黎賊殘陳氏無後  
乃郡縣其地立交趾布政使司都指揮使司按察司分

十七府曰交州北江諒江三江建平新安建昌奉化清  
化宣化大原鎮蠻諒山新平又安順化升華四十七州  
一百五十七縣衛十一所三市舶司一改鷄陵關爲鎮  
夷關安撫人民三百二十萬獲蠻人二百八萬七千五  
百糧儲一千三百六十萬石象馬牛十三萬五千九百  
船八千七百軍器二千五十三萬九千 勅黃尚書兼  
掌布按二司事 勅輔晟僞交趾應有懷才抱德山林  
隱逸明經能文博學有才賢良方正孝悌力田聰明正  
直廉能幹濟練達吏事精通書算明習兵法武藝智謀  
容貌魁偉語言便利膂力勇敢陰陽術數藥醫方技之  
人悉心訪求禮送京師擢用九月輔遣升露布獻俘季

聲蒼及僞將相下獄赦澄蒨等令有司衣食之陞柴胡等指揮使僉事千戶是冬贈故安南國王陳氏子孫七人官 六年七月進封輔爲英國公晟黔國公封升安遠伯八月文人簡定鄧悉反以晟爲征夷將軍帥師討之僞仍叅贊十二月與賊簡定戰於生厥江敗績僞都督呂毅交趾叅政劉昱皆沒 七年二月 勅輔總兵討賊言晟出師失律致賊猖獗今聞鄧悉死而八百媳婦老嫗猶供餽者何人賊云有象五萬又謂我將帥皆易與宜戒慎同心協力早滅此賊五月簡定稱上皇立陳季擴爲大越皇帝改元慶光八月輔敗賊于鹹子關九月又敗之太平海口十月季擴稱故王後請封輔不

聽進兵至清化十一月輔獲簡定及其僞將相 八年  
正月召輔還令晟節制諸軍簡定檻至京伏誅十二月  
季擴乃上表請降遣方通政 諭季擴以爲交趾右布  
政又以其黨陳原樽爲叅政胡具澄景異鄧鎔都指揮  
潘季祐按察副使是月季擴景異復反九年正月以輔  
爲征虜副將軍總兵會征夷將軍晟率師討之二月詔  
赦交趾七月輔晟敗賊于月常江十一月輔率舟師破  
賊于海上 十年八月又破賊于神投海口十月又破  
賊西心江 十一年十二月輔晟會兵敗賊于愛子江  
擒季擴 十二年八月檻至京伏誅 十三年四月以  
輔爲征夷將軍總兵鎮交趾 十四年十一月召輔還

豐城侯彬代輔 十六年正月清化土官巡檢黎利反  
侯彬遣都督朱廣往勦之利初從李橫爲金吾將軍已  
而來降令爲土巡檢輔還遂反稱平定王以弟黎石爲  
相國段莽都督聚賊衆范晏等肆出劫掠廣兵至斬首  
六百擒晏利遁去彬請就交趾戮晏等以徇七月交趾  
右布政使莫勛及交州知府杜希望令縣丞黎獻率家  
人五百力役北京 十七年巡按御史黃宗載言交趾  
新入版圖勞來尤在得人今府州縣多兩廣雲南歲貢  
生及下第舉人未入國學乞仕遠方遂授以職旣乏太  
學教養之素又非諸司歷試之才以故牧民者不知撫  
字理刑者不諳法律若候九年黜陟廢弛益多宜令到



任二年以上者從巡按御史及布按二司嚴覈其廉汙能否上狀黜陟從之 十八年五月 勅侯彬叛寇黎利潘僚車三農文歷等迄今未獲未審兵何時得息民何時得安宜盡心畫方畧早滅此賊交趾叅政侯保馮貴討賊戰死 十九年五月彬請屯田九月彬言利奔老撾我進兵討捕老撾輒遣頭目覽耆郎阻我兵勿入境云卽發兵象大索利送軍門久之竟不獲利 上曰老撾匿賊持兩端令彬遣頭目出京詰之是冬赦利以爲清化知府遣內官山壽 諭利 二十二年 仁宗卽位召福還以洽爲兵部尚書代福是冬交趾叅將保定侯瑛榮昌伯智言壽未至利復反攻大理寺卿楊時

習爲按察使以代謙爲布政使內官馬騏自交趾召還未幾矯旨下內閣書勅復往交趾問辦金銀珠香內閣覆請上正色曰朕安得有此言此奴曩在交趾荼毒軍民卿等獨不聞乎自騏召還交人如解倒懸豈可再遣然亦不誅騏也洪熙元年二月以智爲征夷副將軍總兵討利六月宣宗卽位七月命行在兵部侍郎戴綸副洽贊理智軍務八月賊阮可郎等伏誅十一月勅智及安平伯安都督方政及三司賊利包藏禍心已非一日始若易取誤信人言惟事招撫迄今八年終不聽命忠臣罹害良民被毒其誰之過智等其急進兵務協和成功來春不捷論罪是月上欲棄交趾

問英國公輔尚書義原吉皆曰不可棄問內閣士奇榮  
皆頓首稱善 宣德元年三月智起兵討利進至茶籠  
州敗績四月以成山侯通爲征夷將軍總兵都督馬瑛  
叅將討賊尚書洽仍贊叅軍務安平伯安掌交趾都司  
削智政官爵五月赦交趾十一月通擊賊敗績十二月  
賊攻清化州不利引去以安遠侯升爲征虜副將軍總  
兵保定伯銘左副總兵都督崔聚右叅將由廣西黔國  
公晟爲征南將軍總兵興安伯亨左副總兵新寧伯忠  
右副總兵由雲南率兵兩道討賊兵部尚書李慶叅贊  
軍務工部尚書兼詹事黃福仍掌交趾布按二司事  
勅通守城練兵侯升等至進兵 二年正月 上念久

用兵勞費又問大臣士奇榮力贊上止兵棄交趾便利  
攻交趾城通等出戰敗之斬僞司徒司空太尉少尉太  
監黎笏等四月利陷昌江通歛兵不出賊書與通請和  
通遂許清化諸州地與賊遣指揮闕忠與利所遣人上  
表貢方物七月賊破隘畱關圍丘溫鎮遠侯興祖擁兵  
南寧不肯援城陷逮興祖九月升等師至隘畱關利遣  
人詣軍門上書言窮迫乞罷兵立陳氏後升易賊賊伏  
四起升中鏢死是日銘病卒明日慶亦卒聚兵亦敗諸  
將兵皆阻賊不得進十月通出下哨河立壇與利盟約  
退師且宴利遺利金織文綺利亦以重寶謝通是月忠  
及利所遣人至京表以陳暲爲名實出利 上覽表示

羣臣曰賊表乞復立陳氏後從之便抑不從便羣臣以內閣主議故皆曰從之便上曰然十一月以行在禮部侍郎李琦工部侍郎羅汝敬充正使通政黃驥鴻臚卿徐永達副使詔諭安南言利表言前國王遺嗣曷尚在老撾國人乞封曷王永奉職貢頭目耆老其以實對朕卽遣使授封朝貢如洪武故事又勅通等卽日班師內外鎮守三司衛所府州縣文武吏士携家來歸三年正月通馳奉僞王陳曷遣黎少頴表貢代身金銀人謝罪并送我叛人都督都指揮蔡福等還京乞班師臣兵寡援絕人情警懼賊控扼水陸陷奪城池臣與衆議不如因其納貢請降全師出境再圖後舉臣已

率將士還至南寧侯 命 上覽奏 勅通虧損臣節  
遺笑蠻方如國體何三月少穎至京表稱安南國先陳  
王臣願三世嫡孫臣曷及頭目臣黎利云四月通至京  
羣臣劾通及瑛智安政布政使弋謙內官山壽馬騏等  
下廷鞫言通等失律喪師棄地壽曲獲叛賊騏激變藩  
方論死繫獄 詔籍其家瑛等坐罪有差與祖亦下獄  
五月琦汝敬等還利遣人表謝言曷會病卒族人並絕  
國中推利守國候 命汝敬永達復奉 詔諭利及耆  
老訪陳後聞羣臣又劾晟亨忠奉命與升犄角進兵顧  
逗遛逾時方臨賊境與升等聲聞斷絕賊得專力拒我  
及聞升陷沒又不進援通等輒狼狽引退爲賊所乘殺

傷吏士委棄鎧杖賊勢益橫城池失守乞亟正邦刑  
上曲赦晟令臺中函劾章示晟亨忠俟還京論罪贈交  
趾死節都指揮李任指揮顧福劉順徐騏周安千戶蔡  
顥桂勝知府劉子輔易先知州何忠內官馮智等官武  
官世職文官復其家誅叛臣蔡福等籍其家 四年二  
月汝敬等還利遣人貢方物三月遣琦永達行人張聰  
勅諭利是月琦等還利遣人貢金銀釵器方物并上  
國人奏言陳氏無後利撫綏有方得民心乞令管攝永  
爲藩臣奉職貢 六年五月利遣人陳情謝罪貢方物  
六月遣行在禮部侍郎章敞通政徐琦 詔利權署安  
南國事 七年二月敞等還利遣人貢謝 八年八月

利遣人入貢 九年三月廣西總兵山雲言利死長子  
狂妄次子幼弱奸臣黎問黎察構相讎殺夷民驚懼諒  
山土官阮世寧七源土官阮公庭率衆避難來歸願居  
廣西龍州及太平府上下凍州 勅雲利本起微賤因  
奏立暲從人望朕志在息民遂 詔罷兵徐議立暲利  
遽奏暲死暲之死利所爲也 朝廷卽欲問罪不忍毒  
民令權署國事多行不義爲天所殛爾戒飭邊兵嚴謹  
守備勿忽世寧公庭可善撫之四月琦等還言利死利  
子麟遣人告喪獻金人方物五月遣行人郭濟朱弼祭  
利十月麟令人上表請 命遣敝及行人侯璉 諭麟  
仍權署安南國事十二月欽州貼浪如昔人叛降麟



正統中麟卒子濬嗣 天順中濬被篡弟灝嗣 弘治  
中灝卒長子暉先卒子誼嗣 正德初誼被篡國人請  
以灝庶子調嗣乃遣使 詔諭交酋亦數遣使朝貢然  
時時南侵占城上聞 諭禁之輒陽聽命侵盜如故已  
而中國人多潛入交南至有受僞御史者教之窺伺雲  
南太監錢能貪殘令京衛指揮郭景矯奉 勅旨往來  
交南猾夷奸蘭出入莫敢誰何遂誘我逋逃覘我虛實  
鎮南關外類多華人而臨安諸郡所在有夷賊矣於是  
撫臣屢請增置文武吏士控制彈壓然交人侵奪欽州  
里社我亦不能禁是時調弱懦無爲境內盜起羣下專  
權虐政暴征人不堪命 正德十年調遣阮仲達朝貢

是年陳曷作亂殺暕奸酋莫登庸及其子方瀛結黎義  
昭等共推暕從子諱嗣而討殺陳曷嘉靖改元遣使  
詔諭暕暕且死七年矣諱不請封輒改元光紹曷父  
子亦據諒山等府稱王改元天應莫登庸妻瀨妻逼諱  
走海濱使命不能達而還當是時登庸遂與陳氏分據  
交地杜溫閨鄭綏不肯從登庸已而諱死登庸又曰瀨  
有子應諱弟也矯立應相拒交人曰瀨死久矣應本登  
庸子諱同母弟也嘉靖初田州岑猛叛兩廣總督姚鏌  
計鳩殺之謂岑氏可遂滅疏請設流官治田州而盧蘇  
王受諸孽輒通交南流言搖惑滇嶺間人鎮被論落職  
桂萼初嚮用言提督兩廣非新建伯王守仁不可遂起

新建伯兼兵部尚書總制兩廣江湖諸省軍務新建伯至嶺南始知流官不可設請復官猛子邦相爲田州判官盧蘇亦與土巡檢羈縻之尋新建伯病謂翁萬達曰田州事非我本心後世誰諒我者新建伯初起用皆萼之力萼議禮致位卿輔欲立奇功會安南有亂冀可傳檄取之乃陰以意寓書授新建伯若專爲思田者使密探安南要領而新建伯不答直於奏尾稍及之萼遂恚憾會新建伯卒竟中傷革世爵及卹典云嘉靖十五年哀冲太子生頒詔諸夷禮官言安南久不廷不必遣使請發兵討之下廷議諸大臣不可勅錦衣衛官使安南察之已而又遣禮部尚書黃綰翰林學士張治

使安南時 車駕巡承天綰治行有日又復止兩廣守  
臣言安南莫氏篡逆國內大亂時出侵掠遂 命兵部  
尚書毛伯溫至廣東議方畧進兵討莫氏會莫氏請命  
嶺南知府廉州張岳梧州翁萬達廣州鄒守愚及巡撫  
諸臣亦不欲用兵騷動數省條議上伯溫請赦莫氏以  
爲安南都統使會登庸死子方瀛亦先故伯溫請以制  
命授其孫福海 二十年六月班師論功進秩賞賚有  
差未幾福海復爲黎寧所逐黎氏仍據國莫氏竄居南  
海島上 朝廷置不問至其子宏澤復逐黎氏有其國  
傳子茂泮 萬曆辛巳奏襲職交趾東起欽州西歷左  
江北至臨安元江龍州其孔道憑祥皆要害也由臨安

經蒙自河蓮花灘至其東都可四五日其俗夷僚雜居  
不知禮義獷悍喜鬪不解耕種椎髻剪髮好浴善水平  
居不冠倜儻好謀驪演人淳秀好學其山川佛跡勾漏  
海富良江爲大產金珠珊瑚玳瑁丹珠諸香蘇合油胡  
椒羚羊角犀象兕白鹿猩猩佛佛白雉翡翠蚺蛇蟻子  
監波羅密烏木蘇木境內有越王城天使館浪泊柱銅  
鼓 二十五年十月兵部覆前總督陳大科奏伐夷叩  
關請罪等事奉 旨黎惟潭旣納舊疆又係知罪請  
命不失遠夷恭順之義朕念安南雖係夷邦人民不可  
無統黎惟潭准受安南都統使仍寫 勅諭并鑄印與  
他俾轄一方永遵王化餘俱依擬

建設始末

宋封高璉爲交趾郡王遼金無考元時城邑可紀者錄于後

大羅城路漢交趾郡唐置安南都護府宋時郡人李公蘊立國於此及陳立以其屬地置龍興天長長安府龍興府本多岡鄉陳氏有國置龍興府

天長府本多黑鄉陳氏祖父所生之地建行宮於此歲一至亦不忘本故改曰天長

長安府本華閭洞丁部領之地五代末部領立國於此歸化江路地接雲南

宣化江路地接特磨道

沱江路地接金齒

諒州江路地接左右兩江

北江路在羅城東岸瀘江水分入北江江有橋

如月江路

南冊江路

大黃江路

烘路

快路

國威州在羅城南以下州多接雲南廣西界雖名州其實洞也

古州在江北

仙州古龍編

富良

司農

一云楊舍

定邊

一云明婚

萬涯

一云明黃

文周

一云門州

七源

思浪

太原

一云黃源

通農

羅順

一云來神

梁界

一云梁個

平源

光州

一云明蘇

渭龍

一云舍

道黃

武寧

此以下縣接雲南廣西界雖名縣其實洞也

萬載

立溫

新立

恍縣

紙縣

歷縣

蘭橋

烏延

古勇



供縣

窟縣

上坡

門縣

清化府路漢九真隋唐爲愛州其屬邑更號曰江曰場

曰甲曰社

梁江

波龍江

古農江

宋舍江

茶江

安暹江

分場古文

古藤甲

支明甲

古弘甲

古戰甲

緣甲

义安府路漢日南隋唐爲驩州

倍江

西江

偈江

尚路社

唐舍社

張舍社

演州路本日南屬縣曰扶演安仁唐改演州

孝江

多壁場

巨賴社

他袁社

布政府路本日南卽象林縣東濱海西際真嶼南接扶  
南北連九德東漢末區連殺象林令自立國稱林邑唐  
時有環王者徙國于占曰占城今布政乃林邑故地自  
安南大羅城至燕京約一百一十五驛計七千七百餘  
里詳具四裔考

皇明初設安南等處承宣布政使司與按察司及都指揮  
使司治交州府宣德二年以後改安撫司等官俱聽都  
統使自行黜陟每遇朝貢之年總數奉聞

交州府領

慈廣福安咸蜜利仁三帶五州東開慈廉名  
室美苗清潭清威應平平陸利仁安朗安樂

秩寧立石

一十三縣

北江府領

嘉林武寧北江三州嘉林超類  
細江善才東岸慈山善普七縣

諒江府領

陸那安寧保祿古龍唐安多錦十縣

諒山府領

七州丘溫鎮夷淵縣丹巴脫縣五縣

新安府領

東潮靖安南策下洪四州至靈陝山古贊安

三縣

建昌府領

快州一州建昌布縣真

鎮蠻府領

廷河太平古

奉化府領

美祿西真膠

建平府領

長安一州懿安大寧安

三江府領

北江宣江沱江三州麻溪

宣化府領

廣縣當道文安平原底江

太原府領

石大總安定威化太原十一縣

清化府領九真愛州清化葵州四州安定永樂古藤梁江東山古雷農貢米江能樂福江安樂十一縣

又安府領驩州南靖茶籠王床四州衙儀友羅丕祿上油偈江真福古社上黃東岸石塘奇羅盤石

河華一十三縣

新平府領政平南靈二州衙儀福康左平三縣

順化府領順化一州利調石蘭巴開安仁茶偈利蓬乍今思恭蒲苔蒲浪土榮一十一縣

升華府領升華思義二州黎江都和安全備萬安具熙禮梯持羊白烏義純鷺孟溪錦一十一縣

廣威州領麻籠美良二縣

宣化州領赤土車來瑰三縣

嘉興州領龍縣蒙縣四忙三縣

歸化州領安立文盤文振水尾四縣

演州領

瓊林茶清  
芙蓉三縣

安南僞制亦以交州爲東都僭設五府五部六寺御史臺  
通政司五十六衛四城兵馬等衙門附郭府一曰奉天縣  
二曰廣德永昌其西都今爲清華承政古齋本登庸故鄉  
無城郭以鐵力木作排柵三層爲外衛登庸所自居也外  
分道十三設承政司憲察司總兵使司 嘉靖二十年莫  
登庸歸附後分海陽等十三路各設宣撫司通隸廣西藩  
省三歲一貢

安邦承政司

即交州地領  
府一曰海東

海陽承政司

即新安地領  
府一曰海陽

山南承政司

即諒江建昌奉化鎮蠻建平地領府十一  
口上洪下洪天長廣東應天荆門新興長

安撫仁平  
昌義興

京北承政司

即北江諒江地領府四  
曰北河慈山諒江順安

山西承政司

即交州三嘉興歸化領府六曰  
歸化三帶端雄安西臨洮沱江

諒山承政司

即諒山地領  
府一曰諒山

太原承政司

即太原地領府三  
曰太原雷平通化

明光承政司

即宣化地領  
府一曰宣光

興化承政司

即廣威州地領府三  
曰興化廣威天關

清華承政司

即清化地領府四曰經  
天鎮寧蔡奈州河中

又安承政司

即又安演州地領府八曰又安華  
平思又奇華德先演州北平清都

順化承政司

即順化秋華領府三  
曰順化英都昇華

廣南承政司

即又安領府三曰  
廣南茶麟五麻

入交道三一由廣西一由廣東一由雲南由廣東則用水軍伏波以來皆行之廣西道宋行之雲南道 皇明始開廣西道亦分爲三從憑祥州入者由州南關隘一日至交之文淵州坡壘驛復經脫朗州北一日至諒山府又一日至溫州之北險徑半日至鬼門關又一日經溫州之南新麗村經二十江一日至保祿縣半日渡昌江又一日至安越縣南市橋江下流北岸一道由思明府入過摩天嶺一日至鬼陵州過辨強隘一日至祿平州州西有路一日半至諒山府若從東行過車里江此江永樂中黎季犛堰之以拒王師後偵知其堰處乃決之以濟師一日半至安博州又一日半過耗軍峒山路

險惡又一日至鳳眼縣又分二道一道一日至保祿縣  
亦渡昌江一道入諒江府亦一日至安越縣之南市橋  
江北岸各與前道會其自龍州入者一日至平而隘又  
一日至七源州二日至文蘭平茄社又分爲二道一道  
從文蘭州一日經右隴縣北山徑鬼門關平四十里渡  
昌江上源經右隴之南沿江南岸而下一日至世安縣  
平地至安勇縣又一日亦至安越縣之中市橋江北岸  
一道從平茄社西一日半經武崖州山徑二日至司農  
縣平地又一日半亦進至安越縣之北市橋江上流北  
岸市橋江在安越縣境中昌江之南諸路總會之處隨  
處皆可濟師一日至慈山府又至東岸嘉林等縣渡富



良江以入交州雲南亦有二道其一道由蒙自經蓮花灘入交州之石隴關下程瀾峒循洮江源右岸四日至水尾州又八日至文盤州又五日至鎮安縣又五日至夏華縣又三日至清波縣又三日至臨洮府洮水卽富良江上流其北爲宣化江南爲沱江所謂三江者也臨洮二日至山園縣又二日至興化府卽古多邦城自興化一日至白鶴神廟三岐江又四日至白鶴縣渡富良江其一道自河陽隘循洮江左岸十日至平源州又五日至福安縣又一日至宣江府又二日至端雄府又五日至白鶴三岐江然皆山徑欹側難行其循洮江右岸八者地勢平夷乃大道也若廣東海道自廉州烏雷山

發舟北風順利一二日可抵交之海東府若沿海岸以  
行則烏雷山一日至永安州白龍尾二日至玉山門又  
一日至萬寧州萬寧一日至廟山廟山一日至屯卒巡  
司又二日至海東府海東二日至經熟社有石堤陳氏  
所築以禦元兵者又一日至白藤海口過天遼巡司南  
至安陽海口又南至塗山海口又南至多漁海口各有  
支港以入交州自白藤而入則經水棠東潮二縣至海  
陽府復經至靈縣過黃徑平灘等江其自安陽海口而  
入則經安陽縣至荆門府亦至黃徑等江由南策上洪  
之北境以入其自塗山而入則取古齋又取宜陽縣經  
安老縣之北至平河縣經南策上洪之南境以入其自

多漁海口而入則由安老新明二縣至四岐遡洪江至快州經鹹子關以入多漁南爲太平海口其路由太平新興二府亦經快州鹹子關口由富良江以入此海道之大畧也交州之東有海陽荆門南策上洪下洪順安快府等府去海頗遠各有支洪穿達迤邐數百里大艦不能入故交人多平底淺舟以便入港云

南詔卽雲南大理等處

按南詔自蒙氏細奴羅至舜化貞十有三世立三百十年而爲鄭買嗣買嗣本唐鄭四之後世爲蒙氏清平官唐昭宗光化五年買嗣滅蒙氏而自立改國號曰大長和買嗣死子旻立旻死子隆亶立爲東川節度使楊于貞

所殺鄭氏三傳歷年二十有六而爲趙氏趙氏名善政  
爲清平楊于貞旣殺滅鄭氏遂拔善政而立之立僅十  
月于貞又奪之而爲楊氏改國號曰大義寧通漢節度  
使段思平興師問罪于貞不能禦走死楊氏立僅二年  
而段氏興焉段氏之先有名儉魏者佐蒙氏有功賜名  
忠國擢清平官六傳而生思平思平生有異兆楊于貞  
忌之使人索捕思平逃匿借兵東方黑獃三十七部皆  
助之旣逐楊氏而有蒙國遂改國號曰大理時後晉天  
福二年也思平死子思英立未幾死國人立其叔思良  
思良死傳于素順順以宋太祖建隆四年立時王全斌  
旣平蜀欲乘兵威取滇以圖進于上太祖鑒唐之禍基

于南詔以玉斧畫大渡河曰此外非吾有也由是雲南  
三百年不通中國段氏得以睨臨爨焚以長世在位十  
七年死傳子素英以宋太宗雍熙二年立死傳素庶庶  
以宋真宗祥符二年立死傳素隆隆以宋天禧二年立  
避位爲僧死傳素貞貞以宋仁宗天聖四年立死傳素  
興興以宋慶曆元年立無道國人廢之而立思庶庶以  
宋慶曆四年立皇祐中廣西儂智高掠廣州敗走大理  
狄青募死士往求之會智高死于大理函其首至京師  
段氏至是始聞于中國思庶立三十一年死傳子連義  
義以宋熙寧八年立爲其臣楊義貞所弑義貞篡位自  
號廣安皇帝凡四年段氏臣岳侯高智昇遣子昇太起

東方兵討滅之而立段壽輝立二年傳于正明明以宋  
元豐五年立避位爲僧時國人皆歸心高氏遂奉高昇  
太爲主以宋哲宗元符二年立改國號曰大中臨終屬  
其子太明日段氏不振國人推我不得已從之今其子  
已長可還其故物爾後人勿效尤也太明遵其遺言求  
段氏餘子正淳立之而段氏復興號曰後理國高氏世  
相之人稱爲高國主正淳復國以高太明爲相太連爲  
柵主遣太連朝宋求經籍得六十九家立十三年避位  
爲僧死傳子正嚴嚴以宋徽宗大觀二年立四十年避  
位爲僧死傳子正興興以宋高宗紹興十七年立避位  
爲僧死傳子智興興以宋孝宗乾道八年立死傳子智

連連以宋寧宗慶元六年立死傳弟智祥祥以宋寧宗  
開禧元年立死傳子祥興興以宋理宗嘉熙三年立甲  
辰元兵攻之逆戰敗死宋遣使祭之祥興死傳子興智  
興智以元憲宗元年立壬子忽必然將兵擊之分爲三  
道進薄大理興智及高太祥拒戰大敗興智奔善闡太  
祥就擒不屈斬于五華樓下時白日當午忽雲起雷震  
世祖異之曰忠臣也遂虜興智滅其國段氏自思平至  
興智二十二主歷三百五十年元旣滅段氏而有其地  
得五城八府蠻郡三十有七設大理都元帥府仍錄段  
氏子姓世守其土赦興智封爲摩訶羅嗟管領八方興  
智死元季亂中原多故段氏復據之于是有十一總管

出焉一代總管曰段實元中統二年入覲世祖嘉之賜  
璽書令總管大理善闡會川建昌永昌騰越諸郡以功  
累授行省叅政又攻石城及仁德府有功錫虎符二代  
總管段忠至元中有功授金齒宣慰掌軍民萬戶府三  
代總管段慶元封爲宣武將軍妻以公主入朝歸授雲  
南省叅政四代總管段正五代段隆六代段俊七代段  
義八代段光時元大德中中原板蕩梁王以宗室鎮善  
闡與段氏分域構隙至大二年梁王大破光兵光將高  
蓬守羅那關梁王密招不從乃賂蓬庖人刺之至至正  
十二年九代總管段功繼立明玉珍自楚入蜀分兵四  
掠號曰紅巾明玉珍自將紅巾三萬攻雲南梁王及憲



司官皆奔威楚諸部悉亂功進兵至呂閣敗紅巾于關  
灘江殺獲千計又大敗之於回磴關梁王德功之助乃  
奏授雲南平章妻以女阿禡王雖陽德之心實忌之乃  
密召阿禡付以孔雀膽一具令乘便毒之主潛然不受  
命因私語平章曰我父忌阿奴願與阿奴西歸因出毒  
具示之三諫終不聽明日邀功東寺演梵至通濟橋馬  
逸因令番將格殺之子十代總管買嗣立

皇明高皇帝開基金陵遣其叔段貞白會川入京奉表歸  
款至十一代總管段明而悉屬我版章因改大理路爲  
大理府定賦法築城隍設衛堡立學校比于中州列郡  
詳見輿地考

續文獻通考卷之二百三十五終

續文獻通考卷之二百三十六

皇明進士雲間王圻纂輯

四裔考 西南夷

緬卽雲南緬甸宣慰司等處

按緬國爲西南夷不知何種其地有接大理及去成都  
遠者又不知其方幾里東至木邦南至南海西至戛里  
北至隴川有江頭太公馬來安正國蒲甘緬王五城其  
人有城郭屋廬以居有象馬以乘舟筏以濟其文字進  
上者用金葉寫之次用紙又次用檳榔葉蓋譯而後通  
世祖至元八年大理鄯闡路宣慰使都元帥府遣使招  
諭其主不至十九年遣諸王相答吾兒擊緬至二十年

克緬江頭太公二城西南夷十二部俱降大德元年封  
的立普哇拿阿廸提牙爲緬國王賜之銀印子信合八  
的爲緬國世子錫以虎符仍戒飭雲南等處邊將毋擅  
興兵甲爾國官民各宜安業又賜緬王弟撒邦巴一珠  
虎符酋領阿散三珠虎符從者金符及金幣後于蒲甘  
緬王城置邦牙等處宣慰使司

皇明洪武二十九年始歸附立緬甸軍民宣慰使等司詳  
見雲南輿地攷

### 占城

按占城東北近瓊州順風舟行一日可抵其國東距海西  
抵雲南南接眞臘北連安南世祖至元十五年遣人至

占城還言其主李由補臘者吾有內附意詔降虎符授  
光祿大夫封占城郡王因遣唆都就其國立省撫治之  
王子補的負固弗率十九年六月命唆都將兵擊占城  
不克引還至元二十一年復發兵一萬五千人船二  
百艘命脫歡假道安南擊占城國王因乞回唆都軍願  
以土產歲脩職貢使大盤亞羅日加翳大巴南都十一  
人奉表詣闕獻二象然乍臣乍叛終無順志

皇明洪武初其主阿答阿者首遣其臣虎都蠻來貢方物  
詔遣中書省管勾甘桓等封爲占城國王自是朝貢  
不絕每國王嗣立必遣使請命于朝遣使冊封率以  
爲常

暹羅

按暹羅在占城極南濱本暹與羅斛二國地暹乃赤眉遺種元至正間始降於羅斛合爲一國其國土瘠不宜耕種羅斛斗田平行而多稼暹人歲仰給之俗煮海爲鹽釀秫爲酒氣候不正人尚侵掠男女椎髻白布纏頭被服長衫每有計議刑法輕重錢穀出入之事並決之婦人婦人志量在男子上貿易以貳子代錢人死則灌水銀以養其身所產有羅斛香味極清遠又有蘇木花錫犀象翠羽之屬元成宗元貞元年進金字表欲朝廷遣使至其國大德三年以故事乞鞍轡白馬及金縷衣用丞相完澤荅刺罕言賜金縷衣不賜馬

皇明洪武初暹羅斛國王參烈昭昆牙遣使臣祭思俚儕  
刺誠悉替等朝貢進金葉表 詔賜大統曆 永樂初  
其國止稱暹羅國其王昭祿羣膺哆囉諦刺遣使奈必  
表貢方物 詔賜古今列女傳且乞量衡爲國中式從  
之至今朝貢不絕 萬曆二十年九月經畧侍郎宋應  
昌奏暹羅國正使檇叭喇等願督兵蕩勦倭巢奉 旨  
據夷使所稱具見忠義事關重大還行與兩廣總督着  
移文另選一能事官員與原差官併夷同往彼國宣諭  
朝廷德意取有回文方可頒 勅舉事其餘俱依擬

巴喇西

皇明正德辛未巴喇西國遣使臣沙地白入貢言其國在

南海甚遠始領其王命在洋舶行凡四年半被風飄至西澗海面舶壞唯存一腳艇又在洋飄風八日至得吉零國住十二箇月又往地名祕得住八箇月乃遵陸行二十六日至暹羅國以情白王王賜日給又與婦女四人住彼又四年至今年五月纔附番人奈林船入廣其所貢木厘六枚內金葉表文祖母綠一塊珊瑚肆株琉璃瓶四把玻璃醖四箇及瑪瑙珠胡黑丹

賓童龍國

其國與占城山地連接有雙澗水澄清佛書所云舍衛乞食卽此地也目連所居遺址尚存人物風土草木氣候與占城大同小異惟喪事能持孝服設佛以度死者舊



首出入或象或馬一如占城地產棋楠香象牙貨周金  
銀花布之屬

### 爪哇

按爪哇卽古閩婆國濱海又名昔家龍爲東南諸番之衝  
要元時稱爪哇東抵古女人國西抵三佛齊南抵古大  
食國北抵占城屬國有蘇吉丹打板打網底勿等國其  
在海外視占城益遠自泉南登舟海行者先至占城而  
後至其國其人醜怪情性語言與中國不能相通宋元  
嘉中始通中國後絕宋淳化中其王木羅茶遣使來朝  
貢大觀中復貢元世祖撫有四夷出師海外諸蕃者惟  
爪哇之役爲最大然竟不能克其水有八節澗乃爪哇

咽喉必爭地元史弼高興嘗會兵于此所產金銀珍珠  
玳瑁沉檀龍腦犀象吉貝絞布檳榔桃榔胡椒之屬其  
國分東西二王

皇明洪武三年王昔里八達刺遣八的占必奉金葉表貢  
方物及黑奴三百人納元授宣勅已而我使至三佛齊  
瓜哇要而殺之十三年王八達那巴那務遣阿烈彝烈  
時奉金葉表朝貢上遣其使還詔諭責王遂絕其  
使永樂二年其國東王遣使朝貢請印與之五年西  
王都馬板與東王戰滅東王時我舟過東王城西王殺  
我百七十人西王懼遣亞烈加恩謝罪勅詰責西王  
令償死者黃金六萬兩已而遣人貢萬兩禮官請索如

數 上曰朕利金耶令遠人知畏耳蠲其金賜鈔幣

諭之十六年西王楊惟西沙遣人獻白鸚鵡 正統八

年令三年一貢其國四鄉初至杜板僅千家二酋主之  
派寓多廣東漳泉人又東行半日至廝村中國人客此  
成聚落遂名新村約千餘家村主廣東人番舶至此互  
市金寶充溢人冒饒又南水行可半日至淡水港乘小  
艇行二十餘里至蘇魯馬益亦有千餘家半中國人港  
傍大洲林木蔚茂有長尾獠數萬又水行八十里至漳  
浦登岸西南陸行半日至王所居溝者伯夷僅二三百  
家總領七八人王宮磚墉墉高餘三丈方三十餘里屋  
高四丈地覆板蒙藤蓆跣趺而坐民居茅茨磚庫坐卧

于內王蓬頭頂金葉冠曾縈嵌絲悅腰束錦綺佩短刀  
跣足跨象或乘牛民男蓬頭女椎結上衣下悅男必腰  
刀刀極精巧刑無鞭朴罪不問輕重藤繫刃殺之市用  
中國古錢衡量倍于中國磁麝絳帛國人木抵三種西  
番賈胡居久者服食皆雅潔中國流寓者尚回回教持  
齋受戒曰唐人土人有名無姓尚氣好鬪顏色黝黑裸  
頭赤脚信鬼坐卧無椅榻飲食無匙箸啖蛇蟻虫蚓與  
犬同寢食不爲穢也婚男造女家後五日迎婦金鼓刀  
盾前後甚都婦裸披髮跣足縈嵌絲悅戴被金珠綵飾  
寶釵我有水葬火葬大葬惟死者所欲產金珠銀犀角  
象牙玳瑁青鹽檳榔椒香蘇木訛榔木吉貝倒掛烏綵

鳩綠鳩紅綠白鸚鵡白鹿白猿猴

真臘

按真臘本扶南屬國王姓刹利名質多斯那者始并扶南而有之東際海而接蒲甘南連加羅希北抵占城唐神龍以後國分爲二其南近海多陂澤爲水真臘北多山阜爲陸真臘後復合爲一屬國有恭半真里登流眉蒲甘等國所領聚落六十餘地方七千餘里土產多香銅亦有之自唐至宋累代貢獻不絕宋政和中始通貢宣和初封爲真獵國王與占城等慶元中國人大舉伐占城破之而立真臘人爲占城王故當時占城亦爲屬國皇明洪武初真臘國巴山王忽兒奴遣其臣奈亦告卽等

貢物不絕

## 二佛齊

按三佛齊本南蠻別種居海中舊港與占城爲隣相去五日程居真臘爪哇之間田土甚肥饒米谷所管十五州屬國有單馬令凌牙斯達豐登牙儂細蘭等國王號詹卑其人多姓蒲唐天祐初始通中國宋建隆初國王悉利胡大霞里檀嘗遣使入貢淳熙乾道間猶不絕元世祖至元十七年嘗遣使招之不至風俗物產詳見舊考皇明洪武四年國王哈刺札八刺卜遣其臣玉的力馬罕亦里麻思奉金字表來朝并貢方物至今不絕 嘉靖四十八年廣東大盜張璉林朝曦黃啟荐等築城紀元

建官攻劫 上以都督劉顯叅將俞大猷往勦顯等陰  
賂璉以脅從數百人就戮報捷璉等遁入三佛齊國  
萬曆丁丑中國人見璉等在三佛齊列肆爲番舶長泉漳  
人多主之如中國市舶官體統云

### 重迦羅

其地與瓜哇相接高山奇秀內有一石洞前後三門可容  
一二萬人田谷氣候與瓜哇畧同風俗頗淳國無酋長  
推年高有德者主之煮海爲鹽釀秫爲酒地產羚羊鸚  
鵡木綿椰子綿紗貨用銀花絹又去數程曰孫陀羅毘  
琶拖曰丹重曰圓橋曰彭里不事耕作專尚寇剽與吉  
陀崎諸國相通商船少至

麻逸凍

其地在交欄山之西南洋海中山峻地平氣候稍熱田禾  
倍牧國尚節義婦人喪夫則削髮縵面絕食七日多有  
並逝者得甦亦不再嫁至焚夫日多自赴火死煮海爲  
鹽釀蔗爲酒產木棉黃瓊玳瑁椰花布貨用銅鼎鐵塊  
五色布絹之屬

滿刺加

其國傍海自三佛齊至此十日程山孤人少受制于暹羅  
每歲輸金四十兩以爲納稅 皇明永樂七年太監鄭  
和奉 詔賜以雙臺銀印冠帶袍服建碑封域爲滿刺  
加國暹羅始不敢擾十二年酋長挈妻子入貢方物受



賞歸國

淳泥

本聞婆屬國在西南大海中去古城三十日程所統十四州前代不通中國宋太平興國元豐間國王向打始嘗遣使入貢元豐中國王錫里麻喏來貢元無聞焉俗尚奢侈亦煮海爲鹽釀秫爲酒愛敬中國人見中國人醉者則扶之以歸所產有片腦檀香象牙吉貝布玳瑁鶴頂有貝多加蒙二樹心可爲酒亦產紙類木皮而薄瑩滑色微綠

皇明洪武庚戌遣監察御史張敬之往諭其國辛亥國王馬謨沙遣其臣亦思麻逸奉金銀箋來朝貢永樂

乙酉 詔封其國王麻邪惹加那乃爲國王 賜印符  
誥幣 六年戊子秋八月王率妃及子弟妹陪臣等凡  
百五十餘人來朝貢珍物 賜宴于奉天門冬十月乙  
亥朔王卒于會同館 賜謚恭順葬于安德門外石子  
岡爲樹碑立祠有司春秋致祀子選旺甫四歲嗣爵  
賜玉帶金銀綺幣器皿遣使送之國 十二年 洪熙  
元年皆來朝貢

蘇門答刺

卽古蘇文達那也與花面國相接爲西洋要會東南大山  
西北距海自滿刺加順風九晝夜可至其俗頗淳其產  
鶴頂錫斗蘇木胡椒闊布大茄 皇明洪武中國王遣

使奉金葉表入貢 永樂乙酉國王鎖丹罕難阿必鎮  
遣其臣阿里來朝貢 詔封蘇門答剌國王 賜印誥  
金幣 五年又遣使來貢已而王與花面王戰敗中矢  
死子弱不能復讎其妻發憤令于國曰能復此讎者我  
以爲夫共國事有漁翁聞之率衆敗殺花面王其妻遂  
從漁翁 七年王來朝 詔厚賜之 十年其國故王  
之子率部衆殺漁翁王自立漁翁王子蘇幹刺奔峭山  
思復父讎故王子遣使來訴 十一年 命太監鄭和  
率兵往捕蘇幹刺 十三年歸獻闕下國乃寧王子感  
恩貢方物甚夥 宣德六年貢馬 賜綵段二十表裡  
紗羅各四疋絹十三疋妃紵絲五疋紗羅各四疋絹六

正 十年封其子嗣王自後朝貢不絕

蘇祿

地在東南海中其俗少粒食食魚鰕螺蛤短髮纏皂綬煮海爲鹽釀蔗爲酒織竹布爲業氣候常暑其產竹布玳瑁珍珠 皇明永樂丁酉國東王巴都葛叭答刺西王巴都葛叭蘇哩峒王叭都葛巴刺卜各率其妻子頭目來朝貢珍珠玳瑁諸物 賜王冠服玉金帶蟒龍金銀錢鈔錦幣器皿及妃子女姻戚頭目賜物各有差三王東王爲尊歸至德州卒命有司營葬爲樹碑封其長子都麻合爲蘇祿東王十九年遣使來貢

彭亨一曰彭坑

地在東南海島中暹羅迤西俗尚椎常刻木香爲人殺人  
血祭禱祈福禳災喜供佛其產片腦沉香花錫椰子  
皇明洪武十一年遣使表貢番奴及方物 永樂十二  
年遣蘇麻固門的里等來朝貢

柯枝

其國與錫蘭山相對村落傍海氣候常熱田瘠少收地產  
胡椒通商販 皇明永樂二年國王可亦里遣其臣完  
者答兒等來朝貢十年 詔封其國之山爲鎮國山  
御製碑文 命立其上

花面

地與蘇門答刺接境花面者男子皆以墨刺面爲花獸狀

故名俗淳厚強不奪弱上下自耕而食富不驕貧不盜  
稱善地焉田足稻禾他產亦盛美 皇明國初有使臣  
以海船駐札蘇門答刺遣人往其山採黃瓠酋長感德  
遂入貢

呂宋

海中小國產黃金以故人多富厚且頗質朴不喜爭訟

皇明永樂三年國王遣臣隔察老來朝貢

古麻刺

地在東南海中前代無考 皇明永樂中國王哇來頃本  
率其臣入朝至福州卒賜謚康靖勅葬閩縣有司歲時  
致祭

忽魯母恩

地在東南海中或曰在西徼外國小土瘠產檀香速香胡椒  
皇明永樂三年其王遣臣已卽丁等入朝貢

甘巴里

地在南海中大島上 皇明永樂甲午國王兜哇刺查遣  
臣得名公葛葛等來朝貢

婆羅

地負山面海人多唵佛素食惡殺喜施產珍珠玳瑁瑪瑙  
車渠 皇明永樂四年東西王各遣其臣勿黎哥等來  
朝貢珍珠玳瑁瑪瑙車渠等 賜王紵絲紗羅共六十  
六疋織金大紅錦手巾一副王妃紵絲紗羅共八疋及

其使人等各有差

阿丹

地瀕海近古俚國壘石爲城砌羅股石爲屋田肥收粟麥民以富饒其他產亦多有馬步勝兵七千隣國畏之

皇明永樂九年 詔中使鄭和 賜命互市

錫蘭山

地在大海中多山而翠藍獨高插天其海邊一盤石上有巨人足跡長三丈許四季水不乾相傳爲先世釋迦從翠藍嶼來登此山足躡其迹云下有寺稱爲釋迦佛涅槃真身倒卧在寺亦有舍利子在其寢處俗氣候常暑地豐米穀產寶石水晶 皇明永樂己丑遣中官鄭和



奉勅齋金銀供器及絳粧織金寶幡布施于寺及建  
石碑賞賜國王頭目等始其國王亞列若奈兒鎖里  
人負固不服謀害舟師和以兵擊破之俘其王辛卯獻  
闕下尋宥之遣王歸國壬辰封耶巴乃那爲王自是西  
夷畏服正統十年遣其臣耶巴刺謨的里亞等來朝  
貢珍寶石宣德八年遣使朝貢賜王紵絲十八疋  
紗四疋王妃紵絲八疋紗四疋及其使臣等各有差  
天順三年國王葛力生夏刺昔利把交刺惹復遣使朝  
貢今金陵靜海寺藏有佛寶來自西方每歲時出獻佛  
堂上祝云亦鄭和所取

百花

在海中依山爲國俗饒富尚釋教產紅猴龜筒玳瑁孔雀  
倒掛胡椒 皇明洪武戊午國王刺丁刺者望沙亦遣  
臣八智亞壇等奉金葉表來朝貢

白葛達

海中一小國土瘠俗尚佛 皇明宣德壬子國王遣其臣  
和者里一思等入貢

古里班卒

地 在海中土瘠穀少物產甚薄 皇明永樂三年國王遣  
人馬的等來朝貢又有木骨都東國瀕海堆石爲城堡  
石爲屋物產最多連境有卜刺哇國有竹步國其酋長  
俱入貢又有刺撒國自古里國舟行順風二十晝夜可

至俗淳厚喪葬有禮有事禱于鬼神其酋長亦入貢

磔里

地在西南海中大洲上有諸港可通海產蘇木烏木人淳  
少訟尚佛 皇明永樂三年國王遣使馬黑木等來朝  
貢

打回回

海外小國產蘇木胡椒 皇明永樂三年遣使麻勿等來  
朝貢

淡巴

地在西南海中君臣頗有威儀畜產城屋亦備市有交易  
野無寇盜稱樂土云 皇明洪武十年遣人來朝貢

賜王織金綵段紗羅及其使臣等有差

亦思把罕甘

地在西南海中最要物產豐俗朴厚尚佛畏刑喜施惡奪  
亦有中國人寓焉 皇明永樂中遣使四十人來朝貢  
忽魯謨斯

地在西南海中亦石城石屋自古里國東南行二十五日  
可到民富饒產大馬西洋布獅子駝鷄福祿靈羊長角  
馬哈獸上下皆回回教門喜作佛事常歌舞惡殺 皇  
明永樂三年國王遣臣馬刺足等來朝貢

阿魯

一名啞魯在西南海中與九洲山相望 皇明永樂丁亥

國王速魯唐忽先遣臣滿刺哈三附古俚諸國朝貢  
朝廷遣中官至其國賜以紵絲紗羅共十疋

九州山

與滿刺加隣其山產沉香黃熟香 永樂七年鄭和奉表  
往諭諸番遣官兵入山採香時得徑八九尺長六七  
丈者六株香味清遠黑花細紋其山人駭然皆嘆天朝  
之兵威力若神云

阿哇

皇明永樂中國王昌吉刺遣其臣入貢

麻林

未詳所在

皇明永樂十三年遣人獻麒麟等物 詔厚賜之

馬八兒諸國

南海諸蕃國惟馬八兒與俱藍足以綱領諸國而俱藍又  
爲馬八兒後障自泉州至其國約十萬里其國至阿不  
合大王城水路得便風約十五日可到比餘國最大元  
世祖至元間唆都等奉璽書十通招諭諸蕃占城馬八  
兒俱奉表稱藩餘俱藍諸國未下十六年遣廣東招討  
司楊廷璧招俱藍國主必納的卽書降表附廷璧以進  
言來歲遣使入貢尋卽遣使與廷璧再往宰相馬因的  
與不阿里屏人謂廷璧我一心願爲朝廷奴使札馬里  
丁入朝我大必闡赤赴算彈華言國主也告變算彈籍我金  
銀田產妻孥又欲殺我我詭辭得免今算彈兄弟五人

皆聚加一之地議與俱藍交兵此間諸國皆有降心  
馬八兒既下我使人持書招之可使盡降廷璧還以聞  
卽遣廷璧獨往十九年抵俱藍國主及其相馬合麻等  
迎拜璽書隨遣使入貢俱藍既下餘諸國曰馬八兒曰  
須門那曰僧急里曰南無力曰馬蘭丹曰那旺曰丁呵  
兒曰來來曰急蘭亦解曰蘇木都刺皆遣使貢方物二  
十二年秋八月遣使往馬八兒國求奇貨寶

右馬八兒諸國因元史所載筆之其沿革土風物產  
歷代朝貢俱不可考 本朝亦無

### 西南夷別錄

皇明永樂七年太監鄭和等往占城爪哇滿刺加蘇門答

刺錫蘭山小唎喃柯枝古里等國 開讀賞賜至九年

回京 十年少監楊勅等往榜葛刺等國 開讀賞賜

至 十二年回京 十三年太監鄭和等往榜葛刺諸

番直抵忽魯謨斯等國 開讀賞賜至 十六年回京

宣德六年太監鄭和等往諸番直抵忽魯謨斯等國

開讀賞賜至 宣德八年回京今將受 詔諸國不入

職方者附錄于後

龍牙犀角

其地內平而外尖民皆蟻附而居之氣候常熱田禾勤熟  
俗尚淳厚男女椎髻圍麻逸布穿短衫以親戚尊長爲  
重一日不見則携酒持觥問安煮海爲鹽釀林爲酒地



產沉速降真黃熟香鶴頂蜂蜜砂糖貨用土印有八  
刺布青白磁器之屬

龍涎嶼

此嶼浮滯海面波擊雲騰每至春間羣龍來集於上交戲  
而遺涎沫畚人乃架獨木舟登嶼採取而歸設遇風波  
則人俱下海一手揖水而至岸也其龍涎初若脂膠黑  
黃色頗有魚鯉之氣久則成大塊或大魚腹中剖出若  
斗大圓珠亦覺魚鯉間焚之其香清遠可愛貨於蘇門  
之市價亦非輕官秤一兩用彼國金錢十二箇一斤該  
金錢一百九十二箇准中國銅錢四萬九千文尤其貴  
也

龍牙門 在三佛齊之西北

山門相對若龍角狀中通過船山塗田瘠米穀甚厚氣候  
常熱四五月間淫雨男女椎髻穿短衫圍稍布撈掠爲  
豪遇賊船則駕小船百隻迎敵數日若得順風僥倖  
而脫否則被其截劫泛海之客宜當謹防

吉里地悶

居連迦羅之東蒲山茂林皆檀香樹無別產馬頭商販聚  
十二所有酋長田肥穀盛氣候朝熱暮寒凡商舶染病  
十死八九蓋其地多瘴氣男女斷髮穿短衫貨用金錢  
鐵器磁器之屬

假里馬丁

與交欄山相望海洋中

其地山列翠屏溪田雖有米穀少收氣候常熱俗甚鄙薄  
男女髡髮竹布爲衣種芭蕉採其實以代糧煮海爲鹽  
醱蔗爲酒地產玳瑁玳羊貨用瓜哇布燒珠印布之屬  
竹步

村居寥落地僻西方城垣石壘屋砌高堆風俗少淳草木  
不生男女棒髮出以布兜山荒地廣雨多無霖絞車深  
井捕網魚海地產獅子金錢豹馳鷄有六七尺高者龍  
涎乳香金珀貨用土珠色段色絹金銀磁器胡椒米穀  
之屬

卜刺哇

傍海爲國居民聚落地廣斥鹵有鹽池投以樹枝良久撈

起結成白鹽食用不藉耕種捕魚爲業男女擗髮穿短  
衫圍稍布婦女兩耳帶金錢纓絡頂帶惟有葱蒜無瓜  
茄風俗頗淳居屋壘石高起三五層地產馬哈獸花福  
祿豹麂犀牛沒藥乳香龍涎香象牙駱駝貨用金銀段  
絹米豆磁器之屬

啞魯

自滿刺加國開船好風行四晝夜可到有淡水港一條入  
港到國其國南是大山北是大海西是蘇門塔刺國界  
東有平地堪種稻穀米粒細小糧食頗有民以耕種爲  
業風俗淳朴國語婚喪等事皆與瓜哇相同貨用稀少  
棉布名考泥泥并米穀牛羊鷄鴨甚廣乳酪多有賣

其國王國人皆是回回人山林中出一等飛虎如貓之  
大遍身毛灰色有肉翅如蝙蝠但前足肉翅生連後足  
能足能飛不遠人有獲者不服家食卽死土產黃連香  
金銀香之類乃小邦也

那哈

卽蘇門答剌師古須又達那國是也其處乃西洋之總路  
頭船自滿刺國向西南好風行五晝夜先到濱海一村  
地名荖魯蠻繫船往東南十餘里可到其國無城郭有  
一大溪淡水流出於海一日二次潮水長落其海口浪  
大常有船投沒其國南去有百里之遠是大深山北是  
大海東亦是大山至阿魯國界正西邊海山連小國二

虞先至那孤兒王界後至黎代王界那孤兒卽花面國  
風俗器用俱見前

黎代

黎代又在那孤兒王地界之西其處南是大山北臨巨海  
西連淳里國爲界國民一二千家自推一人爲王以主  
其事屬蘇門答剌國所管土無所產語言動用俱與蘇  
門相同山有野犀牛至多王亦差人捕獲隨蘇門進貢  
南淳里

自蘇門答剌往西好風行晝夜可到其國邊海人民止有  
千餘家卽是回回人王居房屋用大木高三四丈如樓  
起造樓下並不裝飾縱放牛羊牲畜于其內止將樓上

四圍以板析落甚潔坐卧食處皆在其上民居之屋與蘇門同黃牛水牛山羊鷄鴨皆有蔬菜皆少魚鰕至賤米穀當錢使用山產降真香名蓮花降此處最好亦有犀牛國之西北海內有一大平頂峻山半日可到名帽山之西大海正是西洋也番名削沒嚟洋西來過洋船隻俱投此山爲准其山邊二丈上下海水内生海樹被人撈取爲寶物貨賣卽黑珊瑚也其樹大者高二三尺根頭有大拇指大如墨之黑似玉石之溫潤稍有桎枝婆娑可愛根頭大處可碾爲數珠其帽山脚下亦有居人二三十家各皆自稱爲王若問伊姓名則曰阿孤喇楂我便是王或問其次曰阿孤喇查我亦是王甚可笑

也其處屬南淳里國所轄其南淳里王將降香等物進於中國

錫蘭并躰形國

自南淳山開洋好風行三日見翠藍山在海中其山四五座惟一山最大畚名梭篤蠻山彼處之人巢居穴處男子赤體皆無寸衣如獸畜之形土不出禾惟食山芋波羅密菓芭蕉子之類或入海捕魚鰕等物而食人傳云若有寸布在身卽生爛瘡昔釋迦佛過海於此登岸脫衣入水澡浴被人偷藏其衣被釋迦佛誓以此至今人莫能穿衣服俗言出郊嶼卽此地也過此山投西船行七八日見鶯哥嘴山再三二日至佛堂山纔到錫蘭



馬頭名羅里泊船登岸海邊山脚光石上有一足跡長二尺許云釋迦自翠藍山岸脚踏其跡存焉中有淺水不乾人皆以手蘸其水拭面目曰佛水清淨左有佛寺內有釋迦佛混身側卧尚存不朽其寢坐用各色寶石裝嵌沉香木爲之甚華麗及其佛牙并活舍利子等物在堂其釋迦佛涅槃正此處也去此四五十里纔到王居之處國王係鎖里人崇信佛教尊敬象牛人將牛糞燒灰遍捺其體不敢食牛止食其乳如有牛死卽埋之若私宰者王法罪死或納牛頭大金以贖其罪王居之址并大家小戶每日侵晨先將牛糞用水調稀遍塗屋下地卽然後拜佛則兩手直舒于前兩腿直伸于後胷

腹皆背於地而拜近有一大山侵雲高聳山頂有人右  
腳跡一箇入深三尺許長八尺餘云是人祖阿時聖人  
卽盤古之足跡也此山出青紅黃牙烏青米藍石昔喇  
泥窟沒盤等一應寶石是人祖眼淚結成信然其海中  
有雪白浮沙一片日照其沙光彩瀲灩曰有珍珠螺蚌  
聚集其上王置一珠池二三年一次令人取螺蚌傾入  
珠池內作爛差人看守水淘珠出納官亦有竊取而賣  
者其國地廣人稠亞於瓜哇民俗富饒男子上身赤膊  
圍絲布手巾加以壓腰髻鬚并滿身毫毛皆剃去淨止  
畱其髮用白布纏頭如有父母死亡者其毫毛卽不剃  
去以此爲孝禮女人髻鎗腦後不圍白布其新生小兒

則剃頭女則腦後不剃就養至長人無酥油牛乳不食  
其飯若人欲喫飯則於暗處而食不令人見檳榔葉禁  
不絕其口而食米穀豆蔴皆有惟無麥麵椰子至多酒  
油糖飯皆將此物做造而食用之人死則火化埋骨其  
喪家娶親隣之婦都將兩手齊拍曾乳而叫嚎哭泣爲  
禮其芭蕉子波羅密甘蔗等菓皆有瓜茄蘇菜牛羊鷄  
鴨亦有王以金爲錢通行使用每箇重一分六釐中國  
麝香紵絲色絹青磁盤碗銅錢樟腦甚喜則將寶石珍  
珠換易王着人齎寶石等隨同回洋寶船進奉 朝廷

### 小葛蘭

自錫蘭國馬頭到羅里船開往西北好風行六晝夜到小

葛蘭國其國邊海東連大山西是大海國王國人皆鎖  
俚崇信佛教尊敬象牛婚姻等事與錫蘭同土產蘇木  
胡椒不多其菓菜之類皆有牛羊頗異羊青毛脚高二  
三尺黃牛有三百觔者人日食二食皆用蘇油拌飯而  
食市使金錢雖係小邦亦將方物差人進貢

### 溜山

自蘇門答剌國開船過帽山投西南船行好風十餘日可  
到其國番名牒幹無城郭倚山聚居而歇四圍皆海地  
方不廣國之西去程途不等海中天生石門如城闕樣  
有八大處各有其名曰沙溜人不知溜來溜麻里哥溜  
加加溜每都里溜官喫溜此八處皆有所主而通商船

再有小窄之溜傳云三千里有餘所謂弱水三千正在  
此處也其國之人巢居穴處不識米穀但捕魚鰕而食  
不解穿衣以樹皮遮其前後設遇風雨不順舟師失其  
船舵過其溜落瀉水漸無力而沉大槩行船謹防此也  
牒幹國王頭目民庶皆是回回人風俗淳美所行悉遵  
教門規矩人多以魚爲生種椰子樹爲業男女體貌微  
黑男子白布纏頭下圍手巾婦人上穿短衫下以濶大  
手巾圍之又以手巾過頭蓋覆止露其面婚喪之禮悉  
倣教門而行土產降香不多椰子甚廣以外包之穰打  
成繩索賣與造船等用其造番船不用一釘止鑽其竅  
皆以此索聯縛加以木楔然後以番瀝青塗之龍涎香

其漁者常於溜礁上採得如水浸瀝青之樣嗅之無香  
火燒腥氣價高貴以銀對易海貳被人採積如山晷爛  
其肉轉賣暹羅等國當錢使用馬鮫魚切成手臂大塊  
淡晒極乾倉屋收貯名溜魚賣與他國綵嵌手巾其細  
密絕勝他處又一等織金手帕男子纏頭可用其價賣  
銀五兩之貴氣候常熱如夏土瘠米少無麥蔬菜不廣  
牛羊鷄鴨皆有餘無所出亦以銀鑄錢使用中國亦往  
彼國收買龍涎香柳子等物

### 祖法兒

自古里開船投西北行十晝夜可到其國邊海倚山無城  
郭東南大海西北重山國王國民皆回回教門人體長

大貌偉言語質朴土者之飾以白細布纏頭身穿青花如絹紬嵌圓領或金錦衣袍足着靴或淺面皮鞋出入乘轎騎馬前後擁列象駝馬隊及刀牌手吹簫篳嘑吶簇擁而行民下所服冠衣纏頭長衣脚穿皮鞋如遇禮拜日上半日市無交易長幼男子皆沐了卽將薔薇露或沉香油搽其面纔穿齊整新衣又以小玉鑪燒沉檀噯叭兒香立於其上薰其衣體纔往禮拜悉遵教規而行土產乳香其香乃樹脂也其樹似榆而葉尖長被人研樹取香而賣中國寶船到彼開讀賞賜畢王差頭目遍諭國人皆將其乳香并血竭蘆薈沒藥安息香酥合油木鱉子之類來易換其絳絲磁器等物此處氣候常

如七八月不冷米麥豆粟黍稷麻穀及諸般菜蔬瓜茄  
牛羊馬驢猫犬鷄鴨皆有山中亦出駝鷄土人捕捉來  
賣其駝鷄身匾頸長如鶴高三四尺足指每脚上有二  
指毛如駱駝喫豆米等物行似駱駝單峯雙峯俱有人  
皆騎坐街市殺賣其肉王以金鑄錢名倘伽每箇重三  
錢零用此錢王亦差頭目齋乳香駝鷄等物進貢